




具茨晁先生詩序



予曩遊都城於晁用道為同門生後三十六年識其子公武於涪陵又二年見之於武信愛其辯博英峙辭藻藹如也因與之善初不知其為用道子也一日來謁曰先公平生多所論著自丙午之亂埃滅散亡今所存者特歌詩二百許篇涪陵太守孫仁宅既為鑿諸忠州鄴都觀窅然林水之間矣敢旬先生一言以發之予亟聞其語謝曰願聞先君之所以含咏而獨游者公武於是出其家譜謀乃知其先君名冲之字叔用世所謂具茨先生者也予於是聳然曰是必



吾用道也耶第今字叔用為小異耳已而追懷平昔周旋之舊蓋自京師之別絕不相聞今乃幸與其子游又獲觀其所論著為之慨嘆者久之嗟乎予安得不為吾用道一言哉方紹聖之初天下偉異豪爽絕特之士離讒放逐晁氏群從多在黨中叔用於是颺然遺形逝而去之宅幽阜廕茂林於具茨之下世之網羅不得而嬰也暨朝廷諸公謀欲起之廼復任心獨徃高挹而不顧世之榮利不得而羈也至於疾革乃取平生所著書聚而焚之曰是不足以成吾名世之言語文章不得而污也由是觀之叔用之所以傳

於後世者果於詩乎顧其胸中必有含章內奧而深於道者矣宋興五十載至咸平景德中儒學文章之盛不歸之平棘宋氏則屬之澶淵晁氏二氏者天下甲門也太子太傅文元公事章聖皇帝飛詞禁苑垂二十年當是時甄明舊儀緒正禮樂一時詔令皆出其手於是朝廷典章法度之事非六籍之英則三代之器也迨其子文莊公繼踐西省是時文元公方請老家居也宋宣獻以謂世掌書命者惟唐新昌楊氏及見其子而晁氏繼之至慶曆中遂叅大政議論深博識者韙之然則叔用以文莊為曾大父以文元公



為高祖其家世風流人物之美淵淳浚深蓄厚而發  
遠自王文献李文正畢文簡趙文定四三公富有百  
氏九流之書而晁氏尤瓌富閱溢所藏至二萬卷故  
其子孫焯掌勵志錯綜而藻績之皆以文學顯名當  
世予嘗從叔用商近朝人物嘉言善行朝章國典禮  
文損益靡不貫洽由叔用之學而達諸廊廟之上溫  
厚足以代言淵博足以顧問則以詩鳴者豈叔用之  
志也哉雖然叔用既以油然棲志於林澗曠遠之中  
遇事寫物形於興屬味其風規淵雅踈亮未嘗為悽  
怨危憤激烈愁苦之音予於是見叔用於晦明  
消長用捨得失之際未嘗不安而樂之者也嗚呼所  
謂含章內與而深於道者非耶秦漢以來士有抱奇  
懷能留落不遇往往燥心汗筆有怨誹悵悵沈抑之  
思氣候急刻不能閑遠古之詞人皆是也太史公作  
賈誼傳蓋以屈原配之又裁錄其二賦焉至誼論三  
代之陶世振俗固結天下之具與夫秦之所以暴興  
棘亡斬艾天下之術則遷有所不錄也何哉豈遷之  
意謂誼一不平於其中遂哀怨壹鬱泣涕以死借使  
文帝盡用其言則誼亦安能有所建立於天下乎惟  
深於道者遺於世而不怨發於詞而不怒君子是以



知其必能有為於世者也嗟乎吾於叔用豈直以詩人命之哉紹興十一年九月五日陵陽俞汝礪序

具茨晁先生詩序

具茨晁先生詩集目錄

長句

古樂府

洗馬次十二兄之道韻

夷門行贈秦夷仲

送一上人還滁州瑯琊山

陸元鈞寄日注茶

贈僧法一墨

法一以余所贈墨為不佳

復以承晏墨贈之

謝沈次律水枕

次韻王立之雪中以酒見餉

東陽山人僻居

同魯山韓丞觀女靈廟前險石

題魯山溫泉

香山示孔處厚

簡江子之求茶

古詩

田中行

覽古

送王彰素

樸

紀愁

和十二兄

次韻集津兄會群從王彰素宿王立之園明日

西征馬上寄示諸人

復至新鄉廨寄張穉

書懷寄李相如

戲李相如携婦還金鄉

贈張琪君章

効古別昭德羣從



律詩七言

傷心時籍潞公宅

送惠純上人遊閩寄僧

睡起

贈山人沈廣漢

次四兄以道韻效李義山雪

次二十一兄季此韻

和江子我竹夫人

答韓君表

次君表韻答葉少蘊甥

和葉甥少蘊內翰重開西湖見寄二首

和寄葉甥少蘊內翰見招

次韻再答少蘊

復和少蘊

復用韻

次韻集津兄懷嵩少示王立之

次四兄以道韻答許下諸公

次四兄雪夜韻

雪效柳子厚

一作贈一兄上人

擬一上人懷山之什

四兄諸人皆用屋宇詩送一上人余獨留之  
都下追感往昔因成二首

和人遊李和文園

送僧歸建州館谷信不語公

送王敦素樸 刺當心亦王法以

范元章惠然相過見問竒章公服鍾乳二千兩  
事因為長句戲之

再至徐州心慈

留別江子之戲內陳良跡

別昭德第愴然傷懷西陳良詩一首

客有駕馬不肯借作詩誚之

別飾道二十弟

自然詩并序

敦素有以書局處之者作詩迎之

怡怡軒贈王次翁

二十一兄季此生女有詩次韻

律詩五言

積善堂詩并序

亭成

寄江子我



寄王立之

避暑普淨院

僧舍小山

蔡晉如挽

懷王立之

寄江子之

初來東里

至東里次前韻

和四兄以道閑居感嘆有作

復次韻

再至都城

至日

感梅憶王立之

送僧

秋兩感事

次二十一兄季此九日韻

問訊次九日韻

夏室

夜坐

滎澤驛阻雪

次韻江子我見寄

過陳無已墓

懷蘇門山

行武涉田中

重過鴻儀寺

懷濟北弟姪

十六叔父朝散挽祖禹

別飾道二十弟賁之

別息道二十二弟充之

和虞道二十三弟豫之

決道念八弟得小金印以詩贈之

贈江子我子之

梅

謝富察見過

晝寢

小魏買馬久不至以詩寄之

行泌水上

絕句七言

戲留次襄三十三弟頌之

春日二絕句



和子我晚歸

以少炭寄江子之

戲成

和顏伯武丈山寺

王敦素許紙不至戲簡促之

送韓溫父

過鴻儀寺

暮春

樂府

朱少章曝麥為雨所漂

和二十二弟

秋夜情

道中

和四兄清泉香餅句

題超化寺壁

玉字黃庭經

送人游江南

過王立之故居

夜行

和新鄉二十一兄華嚴水亭



春晚圃田道中

和王立之臘梅

次韻江子我臘梅

讀陳平傳

謾興

贈江端本子我

過陳無已墓

和虞道二十二弟

立春

和集津兄謝王立之紅絲花

暮春書事

又次韻謝王立之惠紅絲花

絕句五言

與秦少章題漢江遠帆

龍興道中

次韻四兄蘆橋柳橋

次韻陳叔易恬蘆橋柳橋

次韻朱少章蘆橋柳橋

謝任伯久無書常子然寄茶謝之因簡任伯



具茨晁先生詩集目錄

具茨晁先生詩集

澶淵晁冲之叔用

長句

古樂府

大星何歷歷小星爛如石掖垣崔嵬橫紫微十二羽  
 林森北極今夕何夕月欲沒虎抱空關龍厭直崢嶸  
 北斗著地垂手去瓠瓜不盈尺嚴陵醉卧光武傍浮  
 楂正值天孫織王良挾策飛上天傳說空騎箕尾立  
 君不見茂陵棄子欲登僊自將壯士終南邊忽然遭  
 窘出璽綬歸來下詔除民田阿瞞急示乘輿物鮮卑



仍棄珊瑚鞭又不見古來垂堂戒華屋敵國挾輶戎  
接轂白龍魚服誤網羅孔雀金花被牛觸

洗馬次十一兄之道韻

灞橋春水波鱗鱗橋邊結束何圍人解鞍傍水入洗  
馬飛龍九尺凌漪淪風髻霧鬣才一沐玉花照影光  
滿身月題却貫黃金勒更覺閃艷開精神主人貴想  
不必問特賜內厩天麒麟即今此物亦安用燕山萬  
里胡無塵嫖姚功高自不出長鳴但踏城西春君不  
見少陵時已無伯樂尚有曹將軍寫真

夷門行贈秦夷仲

君不見夷門客有侯嬴風殺人白晝紅塵中京兆知  
名不敢捕倚天長劍著崆峒同時結交三數公聯翩  
走馬幾馬驄仰天一笑萬事空入門賓客不復通起  
家簪笏一作筆明光宮嗚呼男兒名重太山身如葉手  
犯龍鱗心莫懼一生好色馬相如慷慨直辭猶諫獵

送一上人還滁州瑯琊山

上人法一朝過我問我作詩三昧門我聞大士入詞  
海不起宴坐澄心源禪波洞澈百淵底法水蕩滌諸  
塵根迅流速度超鬼國到岸捨筏登崑崙無邊草木  
悉妙藥一切禽鳥皆能言化身八萬四千臂神通轉



物如乾坤山河大地悉自說是身口意初不喧世間  
何事無妙理悟處不獨非風幡群鵝轉頸感王子佳  
人舞劍驚公孫風飄素練有飛勢雨注破屋空留痕  
惜哉數子枉玄解但令筆畫空騰騫君看琅琊讓泉  
上醉翁妙語今猶存向來溪壑不改色青嶂尚屬僧  
家園君行到此知此意辨才第二文中尊西江一口  
盡可吸雲夢八九何勞吞他年一瓣爐中香此老與  
有法乳恩

陸元鈞宰寄日注茶

我昔不知風雅頌草木獨遺茶比風陋哉徐鉉說茶

苦欲與淇園竹同種又疑禹漏稅九州橘柚當年錯  
包貢腐儒妄測聖人意遠物勞民亦安用含桃熟薦  
當在盤荔子生來枉飛鞚羊羶異好亦何有蚶菜殊  
珍要非奉君家季疵真禍首毀論徒勞世仍重爭新  
闔試誇擊拂風俗移人可深痛老夫病渴手自煎嗜  
好悠悠亦從衆更煩小陸分日注密封細字蠻奴送  
槍旗却憶採擷初雪花似是雲溪動更期遺我但敲  
門玉川無復周公夢

贈僧法一墨

黃山之巔百尺松虬枝偃蓋連群峰山神守護魑魅



避道人剪伐天為容，捫崖蹠蹕篝火遠。絕壁晻靄凝  
煙濃，玄霜霏霏玉杵下。捕麋煮角當嚴冬，陰房風日  
不可到。律琯吹盡灰，無蹤小書細字著名姓。黃金照  
耀圖雙龍，守臣再拜選進日。九關有詔開重重，老儒  
偶得實天幸。千金更買無由逢，上人澹泊何所好。工  
書草隸如飛蓬，苦來求我惜不得。一酬十載相過從，  
君不見玉堂詞人紫垣客。拜賜舞蹈黃羅封，長安紙  
價猶未貴。江南江北山皆童。

法一以余所贈墨為不佳

上人好事世莫當，羅列四寶如文房。廣交往往得奇  
物，有墨尺度如圭。長秋麋折角膠與力，春麝入臍煤  
生香。已將雪覆輕羅帕，更令花映紅紗囊。草堂老人  
不自料，亦箴一餅誇精妙。自言和璧持贈君，反為燕  
石遭譏誚。嗚呼萬事孰不然，古今工拙那同調。君不  
見當年諸李數不到，廷寬只今賜墨無老潘。

復以承晏墨贈之

我聞江南墨官有，諸奚老超尚不如。廷珪後來承晏  
復，秀出喧然父子名。相齊百年相傳文，斷碎彷彿尚  
見蛟龍背。電光屬天星斗昏，雨痕倒海風雲晦。却憶  
當年清暑殿，黃門侍立才人見。銀鈎洒落桃花牋，牙



牀磨試紅絲研同時書畫三萬軸大徐小篆徐熙竹  
御題四絕海內傳祕府毫芒惜如玉君不見建隆天  
子開國初曹公受詔行掃除王侯舊物人今得更寫  
西天貝葉書

謝沈次律水枕

沈侯筆力鼎可扛左手截取吳松江折流來此一尺  
枕旨麾巨鰐回濤瀧平生性不好長物舉以遺我嗟  
無雙呼兒快取蘄笛簟掃除塵榻移當窓隨眠置我  
丘壑裏始信孫郎真枕水我生不出長安城四十二  
年塵浣耳領君此枕何瀟然睡起醒心如一洗

次韻王立之雪中以酒見餉

胡雲慘慘驅朝暄龍沙一雪人相憐寒猿哀嘯失山  
木飢鶴仰唳空舞天當年補天真戲尔不知修月何  
時已坐煩耆舊說辛卯至遣兒童憂甲子城中米價  
貴如玉舉家倒廩無斗粟千金狐裘豈易得百結鶉  
衣不堪鬻我生但識茅與菅何曾過眼逢瑤璠辱君  
新詩問所似欲辯不敢非忘言開壺酌酒澆我曾酒  
酣起舞顏為紅會見東風掃冰雪江梅塞柳煩春工

東陽山人僻居

我家京洛間桂玉資薄產平生丘壑心水竹不滿眼



清晨有客吳中來山川指授收奇才突談長揖波浪  
下懷抱遠承一作崑穴開東陽山人高華隱豪俠持  
身復修謹旁山多闢黍稷田碧溪東流汲春醞溪南  
一畝當翠微秋風萼熟菰葉肥龜魚上帶藻荇動鷗  
鷺下拂芙蓉飛亭陰野塘亦新築溪山共作窓中綠  
諸郎年少皆知書子夜哦詩動修竹歲時冠蓋如浮  
雲擊鐘鼎食江山聞愛山自比謝康樂好士不減春  
申君我欲泐溪揚小楫亭邊共醉藤蘿月叩門夜訪  
君家時扁舟重載山陰雪

同魯山韓丞觀女靈廟前險石

君不見魯陽之西兩山麓十里連岡寫平陸青林白  
晝暗古祠雀啁虛簷蛛網屋屋邊恠石何瑰奇鳳筋  
虎骨連肌肉窈巖欲下落澗渚瀕洞千鈞一毫屬天  
匠惟知刻畫功鬼力深憂護持哭前峰高蹇下如楫  
餘峰危慄皆俯伏披尋宿莽得佳趣窪為溪壑呀為  
谷香爐佛迹不在外仙掌蛾眉此其足秀潤潛涵夏  
木清空濛映帶春江綠我知此必蘊靈異何止懷藏  
易城玉閨寂嗟來麋鹿遊孤峻幸免牛羊觸自經千  
載禹刊鑿不逢萬里秦驅逐踟躕三遶回高岡却立  
下視雲蒼蒼古今誰為好事者後有韓子前奇章君



不見玉川先生洛陽宅脩竹蕭蕭獨為客  
它年如與鶴乘軒可來相見銅駝陌

題魯山滿泉

平生耳熟聞驪山夢寐不到臨潼關  
當年太液金井碧溫泉宛在關山間  
憶昔君來必十月騎王花驄帶風雪  
太真獨侍沐浴邊鯨甲龍鱗影清絕  
五十年昇平一迷却驅萬騎出關西  
自為前朝同禍水翻令後代異廉溪  
君不見汝海之南魯山左亦有此泉名  
不播征夫問路說湯頭可伶是亦陳驚坐

香山示孔處厚

我來南經幾山過馬行似衝山色破  
風煙席卷崑穴開澗花縈迴水流左  
懸崖彷彿聞松聲下瞰幽深鳥飛墮  
老夫它年有所歸定結白茅依紫邏  
日高下馬古寺門魚鼓欣聞脫清餓  
道人碧眼照川谷雲起盤陀藉高坐  
殷勤勸我更莫歸唳鶴啼猿亦相和  
窓前笑喚祁孔賓世間安用招蒐些

簡江子之求茶

政和密雲不作團小夸寸許蒼龍蟠  
金花絳囊如截玉綠面彷彿松溪寒  
人間此品那可得三年聞有終未識  
老夫於此百不忙飽食但苦夏日長  
北窓無風



睡不解齒頰苦澁思清涼故人新除協律郎交游多  
在白玉堂揀牙鬪夸皆旣嘗幸為傳聲李太府煩渠  
折簡買頭綱

古詩

田中行

落葉如流人遷徙不可收嚴霜枯百草清此山下溝  
我行將涉之脫屣笑復休憮然顧籃輿崎嶇反經丘  
天風吹我裳彼亦難久留晚過柳下門鳥聲上嘲啾  
父老四五輩向我如有求邀我酌白酒酒酣語和柔  
指云此屋南頗有良田疇勸我耕其中庶結同社遊

吾母性慈儉此事誠易謀伯也父吏隱可以吾無憂  
請歸召家室賣衣買肥牛所望上帝喜祈穀常有秋

覽古

遙岑不娛人蒼莽頗愁絕東南有斷梁水寒不可涉  
西闈不欲往旦莫畏喋褻歸來坐北堂悠然理書策  
之人阿堵中雖死情不隔周公徂東山仲尼陳蔡厄  
大儒且不遇小子何足責時命姑置之胡為常促迫

送王敦素 樸

先君有六女所託皆高門季也父擇壻晚得與子婚  
子家望海內實惟謫仙孫筆也有家法勢作風雷轟



結交多英豪坐致名譽喧憶昔識子初河流出崑崙  
中間一再見騏驥始伏轅去年接同居底裏見所存  
磊落忠義入愛國憂黎元使當元祐時密勿與討論  
上可參廊廟下可裨諫垣惜哉不遇知白髮早已繁  
卑官不可說感激猶主恩爛熳有歸期繫舟古槐根  
祖餞無酒食贈遺請以言子家鐘山下隨事有田園  
竹徑背古寺草堂面江村高軒納翠微修筒引潺湲  
林影散書帙山色搖酒罇日飲建康水時登謝公墩  
沈酣左氏學浩蕩極辭源客至勿多語欲吐且復吞  
書來無忽忽慰我別後魂

紀愁

北風吹我裳夏潦漂我屋牛羊踐我稼雀鼠耗我穀  
雪寒墮我指雨淫疾我腹朝行桑榆間秋序傷遠目  
莫涉水之涯含沙中兩足攬轡馬病黃伏軾輿脫輶  
陟山既見虎還舍乃對鵬一沐三握髮十飯九不肉  
先生昔離垢居士今耐辱飽聞戒畏塗那知有沈陸  
和十二兄五首

淵明詩百篇無一不說酒四顧宇宙間獨與此物厚  
子雲苦家貧日給或亡有艱難識奇字草玄至白首  
時時載酒來尚賴好事友吾兄斯人徒性亦嗜醇酎



寧知俗士嫌益覺兒女醜孰云醉無度婉婉一作婉春月

柳區區布肉論遲速同一朽但看古聖賢得如飲者不  
伯也今代豪嗜詩如嗜酒賦多轉道勁語老愈深厚  
塵言刪不存妙句元自有白華忽補亡關雎不為首  
墳箎起兄弟珠玉到朋友吟詠九日菊沈酣八月耐  
搜剔發清新聯翩雜奇醜詳味吁謨章用思過楊柳  
但使身愈窮未信名可朽不知造物意令作清廟不  
崎嶇謫仙人豪放一寓酒平生韓荊州未識意已厚  
幙府強辟召此例未見有書幣入吾廬鞍馬望隴首  
出處計已熟不復訊交友南山別何時氣尚若酣耐

籌策屈大才談笑誅小醜成角斷落梅羌笛起折柳  
將軍意未快戰士骨已朽請公入參謀可用和戎不  
先生翰墨英揮灑每被酒氣陵蒼柱穹勢壓坤軸厚  
俊拔今固無妙絕古未有驚鳶忽矯翼犇馬時驤首  
高步褚薛流下視鍾王友好事隨取之所至其名耐  
簡踈秦隸奇譎恠夏篆醜么麼張芝草嫵媚元和柳  
載觀碑籍存尚恐金石朽未知太極成有請於公不  
我家溱洧間春水色如酒嵩少在吾旁日夕意亦厚  
田園雖不廣幽興隨事有藥畦灌陳根芋區採駢首  
春郊餉耕徒秋社接酒友飽誦傳家書促釀供客耐



益知簡易真未媿踈拙醜邇來居東都物色不見柳  
造次遇摧折荏苒及衰朽欲歸便可爾未知公果不  
次韻集津兄會群從王彰素宿王立之園明  
日西征馬上寄示諸人以道嘗監陝  
府集津倉  
秋高訪幽居風急桑未落天寒雞犬靜地僻門巷闊  
主人避世賢自說久棲泊呼兒出罇罍梨栗亦不惡  
賓客四五人談笑動林薄夜闌慘無懽離憂倏中作  
伯也天下士千金輕一諾揮斥楊墨徒正是鄒魯學  
如何但銀魚生事了無託惜哉桃李姿見笑葵與藿  
雞鳴驅車行令人意參錯

復至新鄉廨寄張穉

驅車出吾廬落月猶在樹我行欲何之所以河源去  
去去益已遠炯炯不可論群語車鐸間尚想兒女喧  
稍涉原上路漸見柳下村霧草結風露風林散朝暎  
悠悠望遠廬我僕欣載犇昔出日在畢今出壁中昏  
昔如水上鷗今如檻中猿所憂負平生豈但感寒暄  
明濟十里黃漪漪見淇園晚投伯氏廨拓落復何言  
周覽故時居愔見松菊存故侶未易招且自置肴尊

書懷寄李相如

秋風吹畦蔬農事亦已闌黃黃杞下菊佳色尸冢間



我生復何如憔悴嘗照顏清晨戴星出薄莫及日還  
骭髀二十載老髮羞儒冠天末有佳人秀擢如芝蘭  
憮然念夙昔風流得餘權緬想蒲柳姿與君同歲寒  
一別事瓦裂令人氣如山

戲李相如携婦還金鄉

舍人固多奇奉璧登章臺君王擊缶罷將軍負荆來  
長鄉束髮時亦復悅名字一從臨邛遊心迹了不似  
茂陵未得仕要是才足依高堂援哀琴月出載婦歸  
文君入成都乃復愧四壁晚見負弩來良悔抱頸泣

贈張琪君章

春風頗清識評議登草木燕麥與兔葵種種承標目  
如何桃李姿結根滯空谷我將俎豆之析泚恐不欲  
君且為此憤吾亦未免俗

效古別昭德群從

十載一相逢相見無浹旬一生能幾別且復無此身  
昔別尚可惜此別重惜之兩髀跨鞍馬非復少壯時  
它人恠康強自覺筋力衰所苦氣如縷所憂命如絲  
死生亦大矣而乃常別離人生一月間得笑無六七  
朝為衆狙喜莫作枯魚泣已矣泉下人優哉冢中骨

律詩七言



傷心 時籍路公宅

沙路朱幡想馭軒傷心歲月似星奔平泉有墅空流  
水綠野無人但繞垣九老畫圖傳盛事四朝書史載  
殊恩如何巧者持鏹過已向比隣問子孫

送惠純上人遊閩

蚤聽閩人說土風此身常欲到閩中春溝一作春甌水動茶花白

夏谷雲生荔子紅襟帶九江一作樹山不斷梯航百粵一作波連越嶺

海相通北窓夜展圖經看手自題書寄一作索筆遠公題詩送

睡起

素屏紋簟徹輕紗睡起冰盤自削瓜風筍微微開綠

籜雨槐細細落黃花經營薄產初無意補葺踈籬漸  
有涯待得高秋尋靖老臨流坐石問丹砂

贈山人沈廣漢

禪房白几靜無塵野服黃冠意甚真避世全生深得  
策閉門謝客亦高人忍情斷酒非關病隨意收書不  
計貧近約嵩陽陳叔易赴移丹竈過殘春

次四兄以道韻效李義山雪

莫冬一丈長安雪壯士臨風獨慨慷門巷豈無騎馬  
客江湖猶有捕魚郎夜平蔡賊兵輕敵曉入梁園賦  
擅場載酒欲尋誰與飲江梅頭白自悲傷



次一十一兄季此韻

憶在長安最少年酒酣到處一欣然獵回漢苑秋高  
夜飲罷秦臺雪作天不擬伊優陪殿下相隨于為過  
樓前如今白髮山城裏宴坐觀空習斷緣

和江子我竹夫人

黃籐白簟倦呼盧高卧南窓示楷模郭芳藥情元最  
密鄭櫻桃迹近相踈下帷度日甘同夢隱几終年得  
異書晚向禪房陪杖履清秋霜霰意何如

答韓君表

百年鄴杜家相近人物凋零我獨驚但見少陵能繼

祖不聞小陸可優兄終朝詩賦適仍鬱老去老去亦作老文

章健更成敢擬濟河輕一戰隱然望已望已亦作望怯長城

次君表韻答葉少蘊甥

老去幽棲誰比數傳君詩一邑人驚敢叨禮亦推甥  
舅借問年猶媿弟兄今日著龜真有望終身木雁兩  
無成凡才那可供去目送飛霞向赤城

和葉甥少蘊內翰重開西湖見寄二首

使君重鑿西湖罷也復封詩寄我來洲上新題花鳥  
處苑中舊體栢梁臺風煙直覺鍾山近魚鳥渾疑澗  
水開揮翰玉堂還有日行春停騎且留杯



一麾偃蹇江湖去五馬侵尋觀闕來就日金坡通漢  
苑望雲玉澗斷蘇臺自迎檝立看時渡近聞買妾手種花  
行到處開笑語風流韓別駕莫令鸚鵡訴餘杯

和寄葉甥少蘊內翰見招

翰林赫奕今如此莫道人惟舊兩來龐老終身遠州  
府劉郎何面向春臺八兄嘗言少蘊亦欲見招園宜杏子非時結

溪閣梅花過日開兩地聲聞無百里相望一覆手中

杯

次韻再答少蘊知府甥和四兄以道長句并

見寄

錦袍昔是詩成得別墅今非棋賭來山蔚藍光交抱  
舍水桃花色合圍臺通人竹塢深深入謝客松扉遠  
遠開定與西湖爭勝負只應惟欠使君杯

塵埃自與青雲斷歲月誰令白髮來數口無歸關外  
客一春多病望中臺常閑水上鷗從遠只老籠中鶴  
任開日日避愁無處脫直須到手不停杯

復和少蘊內翰甥兼謝伯蘊通判兄再贈

西湖波浪還佳色風物悲人老可驚游接竹林公對  
叔夢迷春色我思兄酒沾鸚鵡杯行盡前與伯蘊兄詩常有鸚鵡

戲杯之詩傍蟾蜍研立成壯思不逢韓吏部高名誰伴



謝宣城

復用韻

史奏德星今復聚鄉評月旦昔何驚  
潁川人望須公守荀氏家聲  
付此兄湖影龜魚同聚散棠陰燕雀半  
生成若為修禊無絲竹古調新詩唱渭城  
少蘊新作木蘭花詩

絕奇

次韻集津兄懷嵩少示王立之

早聞三十六峰前願寄茅茨一澗邊  
谷轉馬蹄山繚繞崑開虎口樹嬋娟  
陽坡日暖宜瓜地陰嶺天寒熟芋田  
便好與公相隱去不宜相對尚茫然

次四兄

以道

韻答許下諸公

古詩

群雄將風騷敵若攻守墨公將百萬兵  
如一劇孟足間楚或揮金伐虞還取玉  
使我備偏裨授書防敗辱安敢凱旋歌  
直可向師哭短兵不須接長城已完築  
畏強我但守用奇公自出入壘畏膝行  
免冠謝頭禿論功轍可丹錫命綬當綠  
顧我老更癡猛虎空手觸

次四兄

雪夜韻

古詩

夏蟲不知冰越犬不識雪我獨冰雪間  
肘見冠纓絕青燈挂長檠文字夜涉獵  
問米米已無問酒酒已竭當時陶淵明  
同日無此闕置書忽不樂面壁卧嘔噎



蟲犬兩不如悲歌聊一發

雪効柳子厚

一作贈一  
兄上人

月落雞聲寒曉色靜茅屋開門驚不知夜雪壓修竹  
槎牙生新冰鱗甲刻溪谷晶晶洲渚明冽冽川原肅  
孤蹲雀不動沈酣客猶宿呼童晨汲歸獨漱寒泉玉

擬一上人懷山之什

中夜雪打窓燈暗光照屋袖手地爐火鉸聲起絲竹  
憶我故山房松風韻崖谷山空牛斗寒寺靜魚鼓肅  
西寨鹿不歸東嶺鶴獨宿更想醉翁亭兩峰高並玉  
四兄諸人皆用屋字詩送一上人余獨留之

才才犬護門喔喔鷄登屋不疑故人來但謂風敲竹  
孤僧雪中歸白馬度塹谷坐久飯食訖尚說毛髮蕭  
吹燈燃溼薪我起子就宿明日且復留長安米如玉

都下追感往昔因成二首

少年使酒走京華縱步曾遊小小家看舞霓裳羽衣  
曲聽歌玉樹後庭花門侵楊柳垂珠箔窓對櫻桃卷  
碧紗坐客半驚隨逝水主人星散落落天涯

春風踏月過章華青鳥雙邀阿母家繫馬柳低當戶  
葉迎人桃出隔牆花鬢深釵暖雲侵臉臂薄衫寒玉  
映紗莫作一生惆悵事鄰州不在海西涯



和人遊李文和園

北李園池推甲第西岡人物復諸生乘鳶此地回緹  
嶺走馬何人出大明六月火雲無復暑百年水木有  
餘清敢陪賓客追前輩知子能詩近得聲

送僧歸建州

清秋潁汝歸時晚不及群公送惠休曲几數行題字  
別扁舟幾日為詩留東吳楊柳雲中渚南越梅花雪  
外洲萬里故鄉聊一到江山風物往來遊

送王彰素樸

龍蟠山色引衡廬霜落江清影碧虛鼓枻厭騎沙苑

馬行厨欲食武昌魚緩歌王樹翻新曲趣入金鑿續  
舊書官達故人稀會面君來相見肯如初

范元章惠然相過見問竒章公服鍾乳三千  
兩事因為長句戲之

君家文物

一作清節

冠先朝破甑生塵久寂寥借有三千

兩鍾乳定無八百石胡椒湘妃暗數江邊瑟秦女高  
吹月下簫不待青春行樂了直持玉檢上宸霄

再至徐州示諸弟

去年客徐得范子今年客徐不得人斷無草木與同  
味宛有魚鳥來相親南尋白門傍山麓西望黃樓行



水濱還家作詩示群從早晚一遊携二陳

留別江子之

盡室飄零去上都試於溱洧卜幽居不從刺史求彭澤敢向君王乞鏡湖平日甚豪今潦到少年最樂晚崎嶇故人鼎貴甘相絕別後君須寄一書

別昭德第愴然傷懷

吾廬去汝到何期四十年間此別離合抱樹元從舊種幾叢菊始自新移老無兄弟飄零日遠有公卿曠絕時努力不辭勤負米欲求三徑可從誰

客有駕馬不肯借作詩誚之

胡兒少欲立奇功貴買西宛玉面驄金躑躅微鳴躡影錦連乾不動追風庭槐洗立清陰下沙路調行返照中出郭借人乘豈肯自誇騎入大明宮

別飾道二十第

飄零南北一衰門知是澶淵五世孫嗟我獨無兄弟在憐君尚有典刑存老身素苦貧常瘦病目仍綠哭轉昏它日汝歸馳駟馬訪吾肯過浣花村

自然詩并序

七里先生江子我築土三尺名曰自然亭余謂先生不獨有亭亦有自然箕斗自然絲菱凡亭之內服食



器用無不自然者先生可謂自足者也雖然無乃多  
虛少實乎子我掀髯大笑余欣然賦之

先生手不廢經營白屋憑虛結此亭燕交兔絲侵密  
坐南箕北斗挂踈櫺青松夾日交傾蓋翠栢分風倚  
列屏莫道君家無長物案頭燈火有流螢

郭素有以書局處之者作詩迎之

君王側席訪詞臣萬里江湖賀子真翰苑向來非此  
老道山何處得斯人朝回金馬門前曉宴罷銅駝陌  
上春底事年年最如意春風還試綵衣新

怡怡軒贈王次翁

先生骨老勁如松柴米辛勤只自供每笑燃箕何太  
急應憐春粟不相容雖能有弟同斯樂忍使無兒繼  
此蹤已約伯兄同卜築連牆投老願相從

次翁不娶

二十一兄季此生女有詩次韻

金盤滿貯華清水看浴蘭芽玉雪容自是迺翁懷直  
道還為健婦有家風樹從此日栽成後酒到他年釀  
熟中剩買嫁資揮首萬不愁婚與貴人通

律詩五言

積善堂詩并序

皇帝即位之五年改元大觀赦天下詔文武吏親年



九十已上者未應封咸賜封之于時吾任城曾叔祖母九十一論當如詔而有司以子無見仕者輒抑之於是叔祖入告于朝既俟命于京師凡若干日

天子聞之詔錫命婦服封壽光縣大君制下姪曾孫中廬令帥昭德族人詣堂賀叔祖顧而喜曰吾歸築堂于任城第以奉壽光汝為我名之中廬令讀制因請名曰積善蓋取制中所謂蘊仁積善以侈上賜也是年秋堂成廼命姪曾孫太史為之記越某日大會諸賓客合樂以落之姪孫莘令作慶壽光曲以獻東州之人相傳為耆老之榮冲之時以事自昭德來

徐徐府通守叔父一日召冲之語且曰吾家由慶國夫人已來七世矣以夫若子受爵者不可勝數然未有以耆德自致如壽光者亦一盛事也不可以無詩吾將賦之汝其同賦冲之謹再拜稽首而言曰惟天子仁故貴老以勸四海之心惟壽光賢故介此眉壽以膺封惟叔祖孝故不旬日感動天子屈有司議而特封之是三者皆宜歌詠其事以示天下後世抑冲之小子也固願以文列名父兄之末况叔父命哉謹撰成績善堂詩十五韻上呈

星次朝當赦龍符夜改元忽傳優老詔周及廢臣門



細札頒殊禮陪封錫異恩大酺堪一笑束帛不須論  
緬想吾宗盛恭惟母德尊孝忠兼仲子辭翰競諸孫  
掖誥金鸞潤宮衣翠翟溫萬錢賓客賀五色帝王言  
諼草開新夏蟠桃屬舊樽曲迎團扇度舞接綵衣翻  
冰下看魚尾霜邊見笋根英聲彤管在繪事畫屏存  
有客依同姓逢人問故園淹留驚伏臘俛仰媿晨昏  
西望浮雲合巾車擬載奔

冲之母永嘉郡君  
年六十六居昭德

### 亭成

故里佗年隱新亭此日成江山俱有助草木盡知名

與便願許從諸生

### 寄江子我

秋日情親四海兄只應常折柳何必更班荆  
老把為活遙將月伴行功名君莫懶吾病負平生

### 寄王立之

臘雨城南宅衝寒憶屢陪拊憐庭下石問訊竹間梅  
諸子簷門立群公跋馬回不知多病後誰與倒樽罍

### 避暑普淨院

天矯栢如龍清幽閔一宮庭無御史雨門有大王風  
今日名天下群公坐此中阿戎相就語歷歷見元豐

### 僧舍小山



此老絕蕭洒，又參曹洞禪。胸中有丘壑，左手取山川。  
樹小風聲細，巖深日影圓。江湖不歸客，相對一茫然。  
愛此聚沙戲，知自法王孫。一運郢斤手，都無禹鑿痕。  
藤梢未挂壁，荷葉欲生盆。笑問山陰道，潛通何處村。  
爛石有佳色，禪房疊更幽。九疑峰不斷，十字水長流。  
枕簟日逃暑，軒窓時卧游。吾衰更何往，只此對湯休。

蔡晉如挽

南部清笳咽，東門素旆飛。如何一老沒，不及二疎歸。  
宇宙那復見，死生從此違。吾年未四十，已歎故人稀。

懷王立之

不到城南义，黃梅幾度新。忽看人日作，淚盡大和春。  
翰墨猶如在，壺觴不復陳。常思醉風度，花底岸綸巾。

寄江子之

平生江季子，踈嬾近忘吾。不啻三年別，如何一字無。  
燒丹岫嶮令，釀酒步兵厨。二者將安擇，功名莫浪圖。

初來東里

乘流從此去，河漢失清都。送騎沙邊散，征帆雨外孤。  
挾雌栖隴雉，生子哺巢烏。宇宙將焉往，飄飄盡畏途。

至東里次前韻

茂陵家四壁，不比在成都。老矣招魂苦，傷哉問影孤。



市中寧有虎屋上豈無烏四海皆行路吾何必此途  
和四兄以道閑居感歎有作

掩卷忽不樂捫心空浩嘆家聲畏淪墜世態屬艱難  
月倒迎門疑風彈挂壁冠蕭然對孤竹一笑共衰殘

復次韻

出門吾所懶無容亦何嘆舉世遽如許孤風良獨難  
荒蕪蔣詡徑破敞晏嬰冠興發看山去書籤記讀殘

再至都城

崢嶸花萼西清曉望猶迷御路紅塵合宮槐碧瓦齊  
夾城知輦過複道覺香低中使傳宣入千門避馬蹄

至日

短晷催長至新晴改故陰風霜游子鬢節序異鄉心  
念坐呼盧轉分曹舉白深百年家魏闕存沒一沾襟  
感梅憶王立之

王子已仙去梅花空自新江山餘此物海岱失斯人  
賓客他鄉老園林幾度春城南載酒地生死一沾巾

送僧

無端伏枕日不見放舟時晚得平安報初成送別詩  
山深歸履急江濶度杯遲定許同香火終參惠遠師

秋雨感事



苦雨荒秋宅寒生木葉悲半垂藤護壁中缺蔓穿籬  
書校時開帙壺提日繫絲儒冠吾已悞何責五男兒  
次二十一兄季此九日韻

清秋九日至晚菊兩三開愁把他鄉酒思登故國臺  
賜懷朝士寵詩想從臣才向晚能無淚飄飄鴈影來

問訊次九日韻

問訊西南戍提封莫遠開休傳通蜀道端可棄輪臺  
擬上平戎策慙無屬國才何須千里馬遠自渥洼來

夏室

夏室不禦暑竹陰新未交幽花時結子晚燕續開巢

午夢還高枕晨炊出近庖此生吾自了客至莫相嘲

夜坐

入夜暑氣薄輝輝星滿空鈎簾倚新月却扇受微風  
瘃渴幾時愈浮楂何處通輕生一快意波浪五湖中

滎澤驛阻雪

去年冬不雪今雪太忽忽輕薄愁兼雨歌斜怯受風  
鴈依寒浦靜鷗噪暮林空憔悴西征客惟應白髮同

次韻江子我見寄

敢恨新居僻深懷故國尊耕耘得遺物版築尚頽垣  
溪隔城南寺崖通市北門它時如訪我但認語音存



過陳無已墓

以我懷公意知公待我情五年三過客九歲一門生  
近訪遺文錄重經故里行寄書無鄭尹誰為葬彭城

懷蘇門山

昔在新中日蘇門歲一游石連沙鑿鑿水遶竹悠悠  
丘壑從茲得江山及此不吾衰思卜築城闕恨淹留

行武涉田中

慣習兒童喜從容父老懽桔槔看俯仰稼穡愧艱難  
荷葉生池岸蒲萄落井幹求田如得此當為駐征鞍  
重過鴻儀寺

秋色遽如許寒花柰若何客行傷老大野次記經過  
廢圃猶殘菊枯池但折荷吾生與物態天意豈蹉跎

懷濟北弟姪

久客思吾子生涯滯故鄉獨携高士傳翻憶紫香囊  
合榻言猶在同堂樂未央翩翩春草夢隨意遶池塘

十六叔父朝散挽

祖禹

慘淡魚山路公歸膺獲麟

車送逾千兩人哀備百身傷心蒿里夜揮淚竹林春  
翰墨傳名教公深有世風斯文今乃喪吾道亦何窮  
埋玉嗟何及揮金樂未終子孫知必盛斷獄有陰功



叔父倅徐州治道士高冲  
誣鄆之大往孫守真變事

別飾道二十第 賁之

少傅三朝老文章壯九州賦詩資政殿賜字太清樓  
拔燭辭軒陛簪花近冕旒慶門吾老矣華國汝能不

別息道二十二第 兌之

中令有清德風流二百年舉家惟食粥絕口不言錢  
里閨容吾老庭闈賴汝賢陶丘過范蠡莫泛五湖船

和虞道二十三第 豫之

向別已復久此懷誰與明書來慰吾意詩重識君情  
放鶴惜未到飛鴻今尚橫何由一隨汝端為薄浮名

决道念八第得小金印以詩贈之 夫之

季也獲金印籀文秦不如情知非鬼篆恨不識天書  
池靜龜遊罷庭閑鵲闔餘春風還舊物踈俊獨憐渠

贈江子我子之

江郎淮海秀經術古同師溫潤無前輩清新有近詩  
一丘須早計五斗莫堅辭獻賦修竿牘知君定不為

梅

素月清溪上臨風不自勝影寒垂積雪枝薄帶春冰  
香近行猶遠人來折未曾江山正蕭瑟玉色照松藤

謝富察見過



飯蔬君莫厭瓜菓我時須自可隨豐儉誰能問有無  
墮蜂衝博局驚燕避投壺不憚過從遠頻來訪老夫  
晝寢

聞說齊州路遙通古睡鄉雲崑迷傳說風峽宴襄王  
日月星辰靜山川草木長不知三代貴何似一張牀  
小魏買馬久不至以詩寄之

聞說黃金厩騏驎惜別群猶來果下馬不必五花紋  
俊骨愁時晚薌萸念夕曛老夫慵杖屨待汝入嵩雲  
行泌水上

肅肅郊原靜牛羊草樹間石磯寒不掃水閣靜常閑

故里無消息孤城絕往還多愁獨來此得見河山

絕句七言

戲留次襄三十三弟頌之

白下春泥尚未乾汴流更待小潺湲不知汝定成行  
不寒食今無數日間

春日

男兒更老氣如虹短鬢何嫌似斷蓬欲問桃花借顏  
色未甘着笑向春風

陰陰溪曲綠交加小雨翻萍上淺沙鶯鴨不知春去  
盡爭隨流水趁桃花

一本作春色不堪流水  
送双浮鳴鴨趁桃花



和子我晚歸

七里灣頭宿鳥飛  
六家店上行人稀  
渡口有船招不得  
歸來稚子候柴扉

以少炭寄江子之

金籍曾通玉虛殿  
仙曹擬拜翠微郎  
莫嫌薄上温磨火  
猶得濃薰篤耨香

温磨火事見李義山詩

戲成

長夏軒窗倚碧岑  
人間塵土莫相侵  
榴花不得春風力  
顏色何如桃李深

和顏伯武丈山寺

松門石磴隱山家  
鍾鼓蕭然一院花  
齋罷老僧來施食  
堦前馴雀趁飢鴉

王敦素許紙不至戲簡促之

摩娑垢面戲陶泓  
拂拭蒼髯笑管城  
已與陳玄俱絕倒  
從君更召褚先生

送韓温父

東風未曉放船行  
卧唱陽關出渭城  
老去與人渾惜別  
不知何處可忘情

過鴻儀寺

折葦枯荷倒浦風  
黑雲垂雨挂長虹  
山僧生養池魚



看不許遊入學釣翁

暮春

濺濺流水曲穿沙林葉深深不過鴉自恨春來渾不

識慙勤着地拾殘花

一作溪流淺  
曲穿沙

樂府

病來飲不敵群豪笑岸紗巾卸錦袍一坐空煩春筍

手玉盃乳酪貯櫻桃

自摘茶蘼滿架空擬將豪氣敵春風欲知盞面玻璃

澗看照紅顏在酒中

朱少章曝麥為雨所漂

看書不覺雨如澗稚子驚呼妻怒嗔豈意持竿護雞

者翻同挾策牧羊人

和二十二弟

靜處偷看肘後書幽棲古有此人無綠蓑青蒻非吾

事白浪狂風滿太湖

襟抱恢疎老更寬笑談終夕盡君歡主人更有桃花

面病眼其如隔霧看

秋夜情

獨眠百感秋夜情孤城急雨中聞更明朝覽鏡視鬢

鬢作

髮不知白從何處生



道中

北風吹雨不能晴  
羸病人騎瘦馬行  
鬢髮向來渾白  
盡半緣憂患半多情

和四兄清泉香餅子

清絕端因栢子香  
風流特可付文房  
如何石火須臾頃  
頃得盡人間一日長

題超化寺壁

曲池風定碧瀾平  
小白魚如鏡裏行  
水竹再來應識我  
壁間不用更題名

王字黃庭經

寶氣宵纏北斗間  
仙書自把下天壇  
誤緣不是凡心起  
月戶雲牕讀字難

送人游江南

湧金門外斷紅塵  
衣錦城邊着白蘋  
不到西湖看山色  
定應未可作詩人

過王立之故居

酴醾架倒花仍發

一作花  
無主

薜荔牆摧石亦移

一作客  
有誰

此地與君凡幾醉  
年年同賦蠟梅詩

夜行

老去功名意轉疎  
獨騎瘦馬取長途  
孤村到曉猶燈



火知有人家夜讀書

和新鄉二十一兄華嚴水亭

近市危樓通野寺  
隔溪高柳接京華  
蕩舟不怕風波急  
看盡芙蓉十里花  
池水泠泠綠未深  
叢篁低草背庭陰  
晚來欲別龜魚去  
更向軒西獨瞰臨

嗜酒不知淹歲月  
好閑又欲棄簪纓  
暫游蓮社同陶令  
終向瓜田學邵平

渚蒲淅淅風猶急  
岸柳纖纖雨尚餘  
栖鷺宿鷗渾去盡  
沂溪還有兩三魚

荷蓋點溪三數葉  
藤梢遶樹幾千層  
投閑更與高人約  
重抱琴來聽廣陵

春晚圃田道中

度柳穿橋聽午雞  
一溝春水國門西  
行人不用傷新別  
看取塵間萬馬蹄  
酒酣馳馬笑彎弓  
便擬長驅向虜中  
但恐老儒無骨相  
不堪劍履畫南宮

君王重老降褒書  
特賜宣陽宅一區  
聞說會稽人不識  
鑑湖還肯借無

和王立之蠟梅



茅簷竹塢兩幽奇岸  
尋花醉亦知崖蜜已成蜂去  
盡夜寒惟有露房垂

老去攀翻興益奇招携風月作新知  
但令春釀常如此百罰深盃亦倒垂

次韻江子我蠟梅

步屨穿花醉曉風翻枝摘葉興何窮  
他年上苑求佳種越白江紅掃地空

江城仍似錦城無半額輕黃笑越妹  
我亦少花如杜

老舍南為乞兩三株

此花吳蜀所無

讀陳平傳

劉郎白首尚多疑百戰功臣迹轉危  
致使文成謝封邑未如還薦魏無知

謾興

符郎傳檄度江南謝老風流倚翠嵐  
但自圍碁君莫問顧翰別墅乞羊曇

贈江端本子我

禪免雞豚今日債斷除妻子宿生緣  
豐登便是人天供努力東臯自種田

過陳無已墓

鎖門脫落封將盡題壁污漫字不分  
我亦嘗參諸第



子往來徒步拜公墳

和虞道二十三弟

千載風流賀秘書也知今有此人無吾家父子真相  
似不愧朝廷乞鑑湖

立春

巧勝金花真樂事堆盤細菜亦宜人自慚白髮嘲吾  
老不上譙門看打春

和集津兄謝王立之紅絲花

故園桃李秋搖落掃地無花可惱公近說城南王子  
妓亦持紅紉劇西風

暮春書事

少年猶在老書生酒後思家夜起程自佩弓刀防不  
測獨隨騾馱雨中行

又次韻謝王立之惠紅絲花

老來嗜酒無賓主我醉應眠不遣卿如許此花同九

日為君採掇笑淵明

九日採菊花  
未免俗尔

絕句五言

與秦少章題漢江遠帆

楚山全控蜀漢水半吞吳老眼知佳處曾看八境圖  
江山起暮色草木歛餘昏誰感離騷賦丹青吊屈原



雲埋鳳林寺浪打鹿門山今日江風惡卽船勸不還  
江濶鴈不到山深猿自迷傳聞杜陵老只在灤東西  
石似浣沙石江如濯錦江征帆向何處雲霧晦蓬窓  
龍興道中

澗道垂黃花山城擁紅葉人爭小舟渡馬就平沙涉  
次韻四兄蘆橋柳橋

公如柳柳州柳橋如柳浪惱殺涉溱人望望不可上  
碧蘆自愁絕黃蘆正枯折宵征鴈影孤墮此橋下月  
次韻陳叔易恬蘆橋柳橋

落日河梁上遲留客去時近隣無遠送莫說最長枝

橋濶狹如馬蘆高低似人白瀕洲上客枉恨洞庭春  
次韻朱少章蘆橋柳橋

蘆橋復柳橋蘆枯柳可愛不厭春與秋主人客有待  
洞庭生白波隴首起黃雲漁舟霧裏見羗笛月中聞  
謝任伯久無書常子然寄茶謝之因簡任伯  
諫議茶猶送郎官迹已踈斜封三道卽不奉一行書

具茨晁先生詩集終



慶元己未校官黃汝嘉刊

其... 慶元己未校官黃汝嘉刊





